

Гўзал фазилатлар соҳиби Шайх Муҳаммад Содиқ Муҳаммад Юсуф ҳазратлари

21:08 / 21.04.2017 3775

Қадимдан юртимизда етишиб чиққан кўплаб алламолар бошланғич таълимни юртимиздаги таълим масканларида олиб сўнгра араб мамлакатларида илмий салоҳиятларини оширишган. Устозимиз Шайх Муҳаммад Содиқ Муҳаммад Юсуф ҳазратлари ҳам Ўрта Осиё ва Қозоғистон мусулмонлари диний идораси томонидан чет элга, яъни Ливия Араб Республикасининг Триполи шаҳридаги Исломиё даъват факультетига ўқишга юборилдилар.

Шайх ҳазратлари Қуръони каримдаги Пайғамбаримиз Муҳаммад алайҳис саломга илк нозил бўган “Ўқинг”, деган буйруқга ва Пайғамбаримиз Муҳаммад алайҳис саломнинг

“Илмни ўрганинглари ва ўргатинглари”, деган тавсияларига астойдил амал қилиб илм олдилар.

Натижада араб студентлари ичида ўз илмий салоҳиятлари ва жамоат ишларида фаолликлари сабабидан талабалар раиси этиб сайландилар. Бу хизматда фаол бўлиб бир неча бора талабаларга раҳбар бўлиб Хаж ибодатларини адо этдилар. Бу фидокорликлари билан Имом Бухорий, Термизий, Самарқандий, Тошқандий, Бурҳонидин Марғилоний каби забардаст олимлар чиққан юртни ўғлони эканликларини кўрсата олганлар. Шайх Муҳаммад Содиқ Муҳаммад Юсуф ҳазратлари мазкур факультетни 1980-йилда имтиёзли қизил дипломга тамомлаб, юртга қайтдилар.

Бу сатрларда ёзилган сўзларни 12-март куни Чеченистон ва Шимолий Кавказ мусулмонлари томонидан таъзия изҳор қилиш учун келган делегация ҳам айтиб ўтди.

Шайх Муҳаммад Содиқ Муҳаммад Юсуф ҳазратлари Ўрта Осиё ва Қозоғистон мусулмонлари диний идораси ҳозирда “Ўзбекистон мусулмонлари” диний идорасининг ташқи алоқалар бўлимида ишлаб, айна пайтда Олий маъҳадда яъни “Тошкент ислом институти”да дарс бердилар.

Мен Сайдалиев Мўминжон 1982-йилда Ўрта Осиё ва Қозоғистон мусулмонлари диний идораси хузуридаги “Совет шарқи мусулмонлари” журнали нашриёти ҳозирда “Ҳидоят” журнали нашриётига оддий ходим бўлиб ишга қабул қилиндим. Устоз билан яқиндан танишдим. У вақтларда “Совет шарқи мусулмонлари” журнали етти тилда чиқар эди. Бу журналларни деярли ҳар сонидан Устознинг мақолалари ҳам берилар эди. Ўзбек тилида эса жуда кам сонда чиқарди. Кам ададдаги журнал фақатгина масжидларга доналаб тарқатилар эди. Бошқа тиллардагиси чет элга жўнатилар эди. Ҳозирда “Ҳидоят” журналидан бутун юртдошларимиз баҳраманд бўлмоқда.

Эсимда, хизмат юзасидан Шайх ҳазратлари раҳбарлик қилаётган Тошкентдаги Имом Бухорий номли олий маъҳадга тез-тез борар эдим. Маъҳадда Ҳазратни талабалар орасида улар билан дўстона савол жавоб қилиб турганларини кўриб, Ҳазратдаги самимийлик, камтаринлик сифатларини уфуриб турганини ҳис этар эдим. 1986-йилда мен ҳам маъҳад талабаси бўлдим. Талабалик давримда Шайх ҳазратларида бўлган фазилатлар, хислатлар Пайғамбаримизнинг фазилатларидан эканлигини тушуниб етдим. Маъҳад талабаларининг барчаси Устозни яхши кўрар эди. Устозни доимо бизларга дарс бериш учун киришларини орзу қилардик. Шайх ҳазратлари тафсир, улумул Қуръон ва бошқа бир қанча фанлардан дарс берардилар.

Ўрта Осиё ва Қозоғистон мусулмонлари диний идораси раиси ҳамда муфтийси лавозимида ишлаган даврларида мен “Чимир ота” масжидида имом хатиб эдим. Ўша даврда турли диний оқимлар авжига чиққан пайтлар эди. Шайх ҳазратлари ҳар чоршанба куни имом домлаларга ислом ниқоби остида фаолият олиб бораётган турли диний оқимлар ҳақида, уларнинг ёвуз нийятлари борасида тушунтириш бериб, уларнинг найранглари очиб берардилар. Қўл остидаги хизматчиларга ўта меҳрибон мушфиқ бўлганлари боис, уларга фақат яхшилиқни истадилар. Ислом ниқоби остидаги оқимларга шерик ва аъзо бўлиб қолмасликни такидлар эдилар. Устозимиз доимо Ислом мусаффолиги учун фаол ҳаракатда эдилар.

Сўнги ўн беш йил ичида Шайх ҳазратлари ўз фаолиятларини янада юқори чўққига чиқардилар. Юзлаб китоблар ёзиб, бир қанча сайтлар очдилар. Юртимизни дунёга танитган Имом Бухорий ва бошқа муҳаддисларнинг илмий меросини халқимизга “Олтин силсила” номи билан тухфа этдилар.

Хозирда Ислом ниқоби остида фаолият юритиб дунёни ларзага солаётган ИШИД (Ироқ Шом ислом давлати) яъни, Ироқ ва Шомдаги Исломнинг душманларига қарши 126 та дунё ислом олимлари қаторида очик хат ёзиб уларни қилаётган ёвузликларини шарий далиллар билан очиб бердилар. Ватанимиз ёшларини уларнинг макру ҳийлаларига алданиб қолмасликларини таъкидлаб ўтдилар. “Очик хат” номли китобларида ва сайтларида ИШИДни ҳар бир ҳаракати на шариатга вана инсонийликга тўғри келмаслигини тушунтириб бердилар. Шайх ҳазратлари мустақил ватанимизда олиб борилаётган барча хайрли амалларда ва юртимиздаги улуғ неъмат, тинчликни асраб авайлаш ишида доимо фаол эдилар. Халқимизни шукронали ҳаёт кечиришга чорлардилар.

Шайх ҳазратларининг ҳаёт йўли барчага ибрат бўларли тарзда ўтди. Бутун умрларини ислом зиёсини тарқатишга, яхшилик қилишликка, эл-юртга, халққа, Ватанга, мусулмонларга, Исломга хизмат қилишга бағишладилар. Шайх ҳазратлари баракали фаолият юритиб, бой илмий мерос қолдирдилар. Шайх ҳазратлари мерос қилиб қолдирган китоблар ва билимлар халқимизнинг, икки дунё саодатига етаклагувчи манба бўлиб хизмат қилишда давом этади. Инша Аллоҳ.

Бизлар 11-март куни шундай улуғ инсон, устозимиз Шайх ҳазратларидан ажралиб қолдик. Юртимиз ва дунё мусулмонлари учун оғир жудолик бўлди. Аллоҳ таоло Шайх ҳазратларини ўз раҳматига олиб Фирдавс жаннатига улуғ мақомларга сазовар айласин. Уламолар замон тургунича боқийдирлар. Албатта улар орамиздан кетган бўлсаларда хотиралари қиёматгача қалбларда абадий қолажак.

Сайдалиев Муминжон

Тошкент Ислом институти мударриси